

ORATIO
IN EXEQVIIS
GREGORII XIII.
PONT. MAX.

*A Stephano Tuccio Sacerdote Societatis
Iesu habita in Vaticano ad Sacrum
Collegium, XV. Kal. Maij.
M.D. LXXXV.*



EX AVCTORITATE SUPERIORVM.

R O M A E,

Apud Franciscum Zanettum

M.D. LXXXV.



TSI GREGORIVS XIII. ob præcla-
ra Pontificatus sui monumenta, Patres am-
plissimi, ita superstes adhuc & in mortaliū
animis, & in concilio viuit immortalium, vt
ex hac funeris pompa, velut ex aromatum

sylua, non tā mortalitatis, quā immortalitatis odores ef-
flari videantur: hic tamen publicus lugentis Ecclesiæ tā-
quā viduæ squalor, Antistitū pullæ vestes, Urbis iustitiū,
populi moeror, lugubres cantus, Cēnotaphij moles, sepul-
chrales faces, atrati parietes, atq. aræ obturbant aciē ocu-
lorū: & faustę quantū acclamationis ac lætitię rerū gesta-
rum gloria, & æternitatis lux, qua nunc, vt piē sperandū
est, ille perfruitur, exigunt: tantum hæc mœsti confessus
vestri noua forma, & Parentis optimi desiderium Orato-
rem angunt, dicentem retardant, acclamātem frangunt,
pectus effodiunt gratulantis. Verū me ipse redarguo,
& animum, qui subinde recurrit ad funus, ad panegyricū
reuoco, vt non tam lamentationi, quā laudationi de-
seruiat. Nam & vobis, Principes illustrissimi, pium quidē
est lugere demortuum; audire verō, quæ vos imitari de-
ceat, salutare: & Deo O. M. earum rerum, quas ipse Gre-
gorij opera gessit, commemoratio, quā fletus noster, glo-
riosior. Dum enim Gregoriū collaudamus, Dei benigni-
tatem prædicamus, ac numen; non solum, quodd fessum
iam annis Pontificem ad beatæ vitæ tranquillitatem ex
hac colluuiōe, & ærumnis euocarit, sed multo etiam ma-
gis, quodd in nostræ memoriæ Gregorio Gregorij Magni
formam atque imaginem effinxerit, nec paucas eius ex-
presserit virtutes: vt quarum memoria vetustate conse-
nuerat, & nouo Pastore refloresceret, & futuris Ecclesiæ
Romanæ Pastoribus præluceret. De ijs Gregorij laudibus
dicere dum cogito, mirari satis non possum, ex tot exi-
mijs oratoribus, quibus & Vrbs, & aulæ vestræ clarescūt,
me vnum fuisse delectum, qui quantam præstare possum
Gregorij celebrandi voluntatem ac studium, non solum

publico Ecclēsiæ nomīne, sed priuato etiā Societatis nostræ, de qua semper ille optime meritus est; tantum, ne illius amplitudini nihil magis, quā infantia laudatoris officiat, pertimesco. Illud quidem me recreat, ac reficit, quod eius res gestæ tam illustres, ac peruagatæ sunt, tamque sua ipsæ luce splendent, ut non tam amplificandi, quam percensendi, nec exornantis, sed indicantis munus exposcant.

Verum vnde primū hæc mea proficiscetur oratio? Nihil hic de Gregorij adolescentis ingenio, atque indole, quæ perinde ac ver nouum, reliquæ vitæ prouentum denuntiavit vberimum. Nihil de bene morata iuuentute, de egregia Iurisprudētia, de Bononiensis academiæ magisterio. Nihil de constantiore iam ætate, quam per medias laudes quasi quadrigis vehentem & vrbs Roma gradatim ad honorum omnium, ac publicorum munerū functiones euexit: & Apostolicæ sedis Legati, cum irent ad Reges, in suo studuerunt habere comitatu. Horro quid attinet exornare dicēdo egregiam eius operam in Decretis Tridentinæ Synodi conformandis, idque tam Pauli III. quā Pij III. Pontificatu? quo præclaro ad eum delato munere, quid de Gregorio Tridentini Patres sentirent, facile declaratum est. Quid, quanta omnī approbatione, quanta celsioris adhuc dignitatis spe ac præsa-
gitione diuina in purpuratorum Patrum ordinem à Pio III. non minus auspiciatō, quā sapienter sit relatus: à quo etiā Legatus ad Hispaniarum Regem missus, quā insigne fuerit sui ordinis hominib. virtutis, antiquitatis, prudentiæ documentum, adhuc prædicant, & admirantur Hispani. Nam fidem, integritatē, solertiam suam quātum is Romanæ curiæ probarit, testatum satis esse voluere duo Pij Pontifices III. & V. cū Apostolicis illum litteris, quæ Breuia nominantur, obsignādis præfecerunt. His instructus artibus, his munitus præsidij, quid mirum est, si vestrum omnium maiore ne dicam consensione, an ce-
leritate

heritate renuntiatus Pont. Max. antè populi totius præiudicio,quàm vestris suffragiis: prius omnium votis,& clamoribus, quàm comitiis, summo dignus Sacerdotio declaratur? Quanta, Deus immortalis, tunc fuit Romæ plaudētis hilaritas? Quàm effusa omnium ordinum voluptas? Quàm illustre quasi signum gētibus vniuersis ad bene de omni Republica sperādum videbatur esse sublatum? Neque spem sefellit Gregorius: cœpit in omnes Ecclesiæ partes excubare, vt quod nouo nomine præseferbat, id certis rerum, ac factorum firmaret euentis. Animaduertebat eorum, quorum gerebat curam, alios ab Ecclesiæ legibus, ac disciplina desciuisse: alios esse quidem orthodoxæ fidei cultores, sed in morū, ac vitæ rationibus claudicare. Has vtrasq. sui gregis partes complexus institit peruigilare prouidus Pastor; sua singulis vel medicamenta, vel pabula ne deessent. Ac primùm quàm incensis semper studijs contendit oues, quæ à veræ Religionis septis aberrabant, in ouile suis, si potuisset, humeris reportare? Vidit ab alijs armorum motus ad hæreticorum impietatem profligandam sæpè tentatos plus cladis retulisse, quàm prædæ; & diuturnitate, vel inauspicato exitu bellorum non magis hostiles, quàm Christianas opes accisas. Itaq. pugnandi rationem aliam sibi putauit ineundam; parcendum armis, ad probitatis, & eruditionis præsidia confugiendum: non telis, ac machinis, sed sapientia decernendum: non externum militem conscribendum, qui in impiorum castra cataphractus inuaderet, sed e transfugarū parentum domibus, ac complexu abstrahendos adolescentes, qui credendi, viuendiq. optimis legibus instituti cum suis ipsi postea ciuibus, gentilibus, necessarijs pedem non vulnerando, sed bene viuendo, disputandoq. conferrēt; vt quos neq. cēturio, neq. turma valeret, sapiens, ac pius Sacerdos debellaret: & quò gladius nō posset, penetraret oratio. O admirabilē viri sapientiā; o inuētum salutare. Frema, licet, Lutherus; insaniat Calvinus; debacchetur Zuin

glus: ferrum inent Centurias: aliud cudent Euangelium: nouos inuehant Christos: vnus vos lacerat, ò nocturni prædones, vnus vos cruentat Gregorius: & excitatis per Germaniam, Galliam, Sarmatiam, Pannoniam iuuenum Seminarijs, tanquam aggeribus fidei, vias vestris satellitijs intercludit, vestris vos implicat retibus: & intra fines, ac parietes vestros vestris vos liberis, vestris vos alumnis oppugnat. Neque verò vnum ille vel alterum vobis opposuit propugnaculum, sed suum singulis pene gentibus extruxit; Prutenis, & Suecis Brandeburgense, Vilnense Lituanis, Bohemis Pragensis, Morauis Olomucense, Austriacis Viennense, Græcense Sciriace, Dilinganum Germanis, Fuldense Saxonibus, Mussipontanum Scotis, & Hibernis, Heluetijs Mediolanense, Britanis Rhemense, Claudiopolitanum Transylvanianis. Sed quid ego tam longinqua commemoro? Quot in Vrbe videris contubernaliū iuuenum Collegia, tanquam Religionis arces, ad quas externæ gentes quotidie ex Oceano, ex Alpibus, ex Peloponneso, ex Synagoga, ex Palæstina confugiunt? O te felicem Gregorium: quoties vel urbem, vel orbem terrarum spectabis è cœlo, toties de alumnorum tuorum domicilijs, toties de castris tuis aduersus Madian & Amalech, toties de singulari sapientia tua cogitabis: qua non solum ætatis nostræ portēta, sed priscos etiā Nestorios, Eutychetes, Dioscoros, Seueros Oriente pene toto persecutus es, dimissis Alexandriam, Antiochiam, Hierosolymam, Constantinopolim, & in vrbes alias legationibus: quibus lacesiti sunt ad pugnam Monophysitæ; inuitati ad renouandum priscum fœdus Armenij: Græci, ac Maronitæ ad Romani cæli cultum ac mōres euocati: Subalpina gētes excultæ: Suetiæ Rex sui muneris, ac Religionis admonitus: Dalmatis, & Epirotis Christiana pietas; quæ multis iacebat locis, restituta. Hæc cum recordabere Sanctissime Pontifex, tuæ non parum liberalitati, ac prouidentię gratulabere: & Pontificibus alijs, quæ sint boni Pontifi-

Pontificis partes tanquam viuis ac spirans interpretabere de sepulchro. Verum longius, quam voluiffem, dicendo progressus sum in ijs, quæ contra Religionis oppugnatores acta sunt: ad Catholicorum nunc res accedamus. Mitto, quàm multa, quæ siue populi, siue Cleri vitio dilapsa iam defluerant, nouis curauerit decretis, ac seueris legibus vincienda. Mitto & Pontificij Iuris, cuius vterat consultiſſimus, ita fuit & in candorem pristinum restitutor: & œcumenicorum Conciliorum, Tridentini præsertim, auctoritatem in rebus gerendis, Ecclesiæq. administranda sartam tectam quam caste, integreque conseruari. Mitto, quot ab illo iudicia grauissimis de rebus constituta, & multis siue temporum, siue causarum difficultatibus impedita, inſperato pene exitu conclusa sint. Testes quamplurimi, Coloniensis in primis Archiepiſcopus, quem sacrilegis inhiantem nuptijs, & aduersus Imperiũ, ac Religionem non pauca molientem, Gregorij tum sententia, tum subsidium ab Ecclesiæ gubernaculis deiecit: deiectum, in angustam compulſit munitionem: inde verò profugientem, in terras vltimas exturbauit. Atque hæc iudiciorum sunt, ac forensis strepitus: quid illa pacis studia? Fuitne alius Pontifex vllus amantior concordie, aut diligentior publicæ quietis fundator? Gratulamur tam Genuensium, quàm Melitensium Equitum disidia, & simultates, quod malum in dies manabat latius, nec sine aliarum gentium tumultu, æquissimo iure sublata? Sustulit Gregorius. Admiramur Polonos inter, & Moschos, homines ad armorum fragorem, ad perpetuas inter se dissensiones atque odia, ad mutuam internecionem natos, amicitiam stabili fœdere conciliatam? Conciliauit Gregorius. Lætatur tam diuturna pacè per omnem Italiam, ut quæ creberrimis ardere bellis ad vastitatem vsque, ac solitudinem solebat, ad humanitatis cultum, & ad pristinae pietatis consuetudinem reuocata videatur? Reuocauit Gregorius: qui cunctando maluit, si quid emerſerat discor-

discordiarum, sedare, quàm eorum, quos adamabat vt Pater, fortunas ac salutem in discrimen adducere. Hæc fuit Gregorii mansuetudo, hic tranquillitatis amor, hæc quieta consilia. Sed quid ago, Patres Amplissimi? Laudationem hanc, quæ de curso iam spatio calcem videbat, vix dum è carceribus emissam animaduerto, cum cogitatione refero ad eorū multitudinē, quos ita Gregorij beneficia deuinxere, vt ei se nec minora, nec pauciora, quàm parentib. accepta referre testentur. Vultis vniuersos hominum ordines, omnia publicarū rerū genera, quantū Gregorio debeant, percunctemur? Quid Vrbs Roma? Quantum nouis illa fontibus, basilicis, repertis atque insigni pompa translatis Diuorum corporibus, horreis, pōtib, palatijs, gymnasijs, vijs, porticibus, quæ, tanquam rerum mutarum linguæ, Gregorij nomen in omnem loquentur æternitatem, in pristinum videtur excitata splendorem? Quid clarissimus, ac sacrosanctus Senatus vester, Patres amplissimi? Quanta Gregorij fuit cunctatio, quanta consiliorum tarditas, cum rei magnitudinem secum reputaret, in hominibus vestrum in ordinem cooptandis? Ab ijs verò, quos cooptauit, quantis laudū ornamentis, quā varijs virtutū luminib. Collegiū vestrū, velut cœlū syderib. illustratur? Et quidem si genus spectatur, agēte Gregorio confessus vester non Dynastarū modò, sed Regū etiam, ac Cæsarū sanguine purpurascit. Duo hæc maxima profecta sunt à Gregorio in Senatum vestrū beneficia, infrequens vsus aggregandi in Senatum, & sagax in aggregando delectus: digna plane, quæ reliquorum etiam Pontificum consuetudine sanciantur. Sed in percensendis, quibus ille beneficijs obstrinxit plerosque omnes, illud admiror, Gregorio non modo bene merendi nunquam voluntatē, sed ne fœlicitatem quidem defuisse, vt ad cursum incitatissimo, hoc etiam calcar diuinitus videatur admotum. Id quod cum cæteris ex rebus planū sit, tum ex eo, quod in eius Pontificatum, statim temporis vertente curriculo, incidit

incidit Iobeleum, religiosissima celebritas expiationum:
 quam effulis conuenarum centurijs frequentissimam,
 quanto ille Templorum apparatu, & expolitis palam Di-
 uorum ossibus consecrauit? Quantum vijs siue aperien-
 dis, siue sternendis, siue amplificandis honestauit? Quan-
 ta comعات, annonæ, frugum omnium copiâ cumu-
 lauit? Quot institutis, religiôisque inuentis peregrino-
 rum non aluit modò, sed inflammauit pietatem? Quan-
 ta Xenodochiorum, Sodalitatum, Sacerdotum, Optima-
 tium sedulitate perfecit, vt ab ijs, qui ex quacunque cæli
 plaga conuenissent, nihil ad securitatem, nihil ad hospi-
 tium, nihil desideraretur ad victum? Ex quo non iniuria
 factum est, vt ab Vrbe recedentes externi, Romam gen-
 tium patriam, Apostolicam sedem, Matrem populorum,
 Gregorium autem verissimum omnium Parentem, dissimili-
 limis quidem vocibus, simillimis verò sententijs prædica-
 rent. Vera sunt hæc, dicet aliquis. Quid recens illud
 Gregorianæ felicitatis exemplum? Ab insulis Japonijs;
 quarum propter disunctissima terrarum, ac maris inter-
 ualla vix nomen ad Romanas aures peruenerat, missa est
 officij, & obsequij causa ad Gregorium Pont. Max. sub
 extremum pene sui sacerdotij diem illustris & prima post
 Christi principatum, ac hierarchiam, legatio, hoc est, Iu-
 uenes duo Regiæ stirpis, præclaræ indolis, eximie pieta-
 tis laude florentissimi. Quos vicissim quanta Gregorius
 complecteretur beneuolentia, cognoscere non ita pridè
 potuistis. Vidistis longæuum senem in Iaponiorum iuue-
 num complexus ruentem. Vidistis collacrymantem, cum
 primas ex remotissimis hortis Antipodum decerptas Deo
 fruges offeret. Vidistis apparatus, Antistites, pompam,
 veltium splendorem, cæteraq. & honoris, & amoris signi-
 ficationes, vt acerbissimum tanti Parentis obitum ado-
 lescentes regij optimo iure complorent. Porro quid mi-
 ramur, in omnes terras Gregorij manasse beneficia? Ad
 cælum quoque (si dicere fas est) pertinuerunt. Solis, ac Lu-
 næ cursus, quo annorum spatia, & festorum dierum vicis-
 titudi-

situdines internoscuntur, assidue à Mathematicis obser-
 uatus, frequenter agitatus in Synodis, à sanctissimis Pa-
 tribus non oscitanter exploratus; fluctuare tamen nun-
 quam desijt, donec Gregorius insignium Astronomorum
 opera, rogatisq. Regnorū, ac Rerum publicarum sententijs,
 ita C. Iulij Cæsaris anno, & Nicenæ Synodi decreto se-
 quester intercurrit, vt indissolubili lege nobis cœli con-
 uersiones, & temporum, celebritatumq. recursus, atque
 interualla constarent. O prouidentiam viri singularem,
 quæ non terras modo complexa est, sed astrorum quoq.
 cursus ad Ecclesiæ vsum redegit, iussitque, vt ita loquar,
 cælum Christianæ disciplinæ ritibus deseruire. Iam verò,
 si placet, orationem plus nimio vagantem deuocemus e
 cælo; & in Urbem, Italiamq. retrahamus: in qua si Gre-
 gorianæ sedulitatis, ac beneficentiæ monumēta conqui-
 rantur, & voce præconis omnes, quos Gregorij liberali-
 tas subleuauit, se prodere iubeantur, tendent nanus con-
 tinuo pupillorum, viduarum, ægrotantium, victorum,
 aduenarum, captiuorum greges, quorum nomina etiam
 descripta seruabat Gregorius, & velut amantissimus Pa-
 ter alimenta, vestes, hospitium, sumptus in alias res, pro
 vt singulis opus erāt, etiam non rogatus diuidebat. Hinc
 Vrbe tota collachrymatio pauperum, & velut ad commu-
 ne funus eiulatio. Tendēt virgines nobiles, & adolescen-
 tes ingenui: quorum illas a dedecore, ac maximis pudici-
 tiæ periculis, collata in earum dotes pecunia, vindicauit;
 hos vero non paucos vel orbatos parentibus, vel euerfa
 patria profugos, dum recte litteris, ac moribus instituerē-
 tur, attributo redditu sustentabat. Tendēt & Neophytorū
 domus, quam in Vrbe fundauit; & Dalmatæ, quos ad ædē
 Lauretanam, vt virtutum, doctrinarumq. studiis vaca-
 rent, collocauit, spem gentis Illyricę, magna sacerdotū
 & inscientia, & penuria laborantis. Tendent Religioso-
 rum hominum familiæ, de quarum singulis si dicere non
 vacat: at mihi nequeo temperare, quin sociorum meorū
 omnium nomine, qui voces suas in mea vnus voce sita-
 esse

esse percipiunt, immortales agā gratias beneuolētissimo Parenti, cuius magnificentissimis decretis ornati sumus: tutela ac præsidio defensi: auctoritate communitiope, ac facultatibus recreati: & in hac pulcherrima orbis terrarum arce, ac domicilio, insigni extructo Gymnasio, longe plusquam mereremur, honestati tandem multiplici beneficiorum genere subleuati per omnem Christianum orbem ad extremos vsque Indos, atque insulas Iaponias, ad quas etiam vel maximis diffitas locorum interstitijs Gregorianæ munificentiae lux penetrauit, easq. Collegijs aliquot exornauit, & Seminarijs regionum etiā puerorum. Misericordem Tabithæ industriam maiores nostri de mirati sunt, quam & commendauit Apostolorum princeps, & viduæ predicauere cōplures, eiq. vitam, atq. incolumitatem expositis eleemosynarū pretijs redēmere. At quantula hæc omnis benignitas est, si cum Gregoriana cōferatur? Circumstent Grēgorii tumulum, quos Grēgorij solabatur ærarium: lachrymis, & precibus in cœlum suis reponant gratiam, quam ab eis Grēgorij largitas iniit pignore benefactorum! Quam existimamus abunde, quam luculēter ac facile Grēgorio Deum, Deiq. immortalitatem demerebunt tot puellarum conseruiatus pudor, tot viduarum recreata solitudo, tot liberatio vinctorum, educatio tam multorum adolescentium, suscepta tot gentium patrociniā, tot deniq. martyrum triumphis? Martyrum, inquam. Quid enim aliud esse dicam tam Romanum, quam Rhemiensē Anglorum domicilia, Grēgorii cum censibus, tum consilijs instituta, quam duo martyrum Seminaria? vt in quo solo Grēgorius Magnus Christianæ religionis sementem fecit, ex eodem Grēgorius noster gloriosissimā piorum messem, & vberē sanguinis vindemiā inter compedes, vngulas, scorpiones, equuleos, cruces, ceteraq. tormentorū fulmina, ac tonitrua retulisse videatur. Aequū enim fuit, vt Grēgorij pontificatū, quem institerant inferorū furia veterū rursus tyrannorū immatritate, & procellis tanquā denuo nascentis Ecclesiæ perturbare,

turbare, eundē præpotens Deus prisca catholicorū virtute, veteris patientiæ trophæis, antiquæ fortitudinis monumētis, & clarissimis Martyrū victorijs illustrarer. Te nūc appello Pont. Max. te, inquā, nobis quidē extinctū, de cælo tamē (vt religiose opinamur) collucētē. Enauigasti tādem ex terrarū Syrtibus, & vitæ huius scopulos præteruectus in optatissimo portu conquiescis. Multa nobis reliquisti, quæ collaudemus; multa, quæ imitemur; laboris tolerantia, indefessam operā in cognoscēdis transigēdisque negotijs, singulari comitatē conditā grauitatē, amplificandæ Religionis studiū, frugalitatē, parsimoniā, pietatē in orando Deo; in procurādis sacris assiduitatē, æquitatē iudiciorum, atq. innocentia. Ego vero nihil admiror magis, quā incredibile tuā mansuetudinē nullis labefactatā offensionibus, & inauditā in summa potestate rerū omnium moderatiōe animi, vt in tantæ dignitatis fastigio nihilominus, quā cū priuatus agerēs, intēperantiā oderis, & insolentiā, nullo sacerdotij culmine, nullis adulatorum vocibus, nullo plausu populi acclamantis elatus. Recte, opinor, humanarū ille imbecillitatē, fragilitatēq. cogitabat, & ad futurū aliquando extrēmū diem, quo quicquid vspia honoris, gloriæ, celebritatis est, euanesceret. Hæc ipsa vrbs, hæc Basilica Principis Apostolorum, hæc Patrum corona, qui Gregorium videre quondam, hexaphoris, aurata, & tanquā curulis sella, ceterisq. pontificiæ Maiestatis insignibus coruscantē; ijdē per hosce dies illū viderunt exanimē, redactū in aliorū mortaliū ordinē, in feretro iacentē, & de Pontificij celsitudine solij in prædiores tumuli squalentis abiectū. Hic exitus, hic occasus est honorū omnium: ad hunc scopulū quæcunq. admirātur homines, illisa frāguntur: in has tenebras, ac solitudinē redigendū, quicquid in mortaliū oculis enitescit. Continenter ac pie viuēdi norma moris est: nec vitæ stadiū recta decurrit, qui in stadij metas non defigit obtutum. Hæc laus, hic apex sapientiæ est, ea viuētē appetere, quæ morienti forent appetenda.

F I N I S.